


名儒草堂詩餘





叢書集成

初編

主編者
王雲五

商務印書館發行



名儒草堂詩餘



廬陵鳳林書院輯

本館叢書集成初編所選讀書齋叢書及粵雅堂叢書皆收有此書讀書覆元本譌誤頗多粵雅則素恩復以讀書本嚴氏抄本厲樊榭本合校故據以排印

精選名儒草堂詩餘總目

唐宋名賢詞行於世尚矣。方今車書混一。名筆不少。而未見之刊本。是編輯欲求備不可。姑摭拾所得。才二百餘首。不復次第。刊爲前集。江湖大寬。俊傑何限。儻有佳作。毋惜緘示。陸續梓行。將見愈出而愈奇也。

卷上十四人計六十二首

太保劉公二首

文山文履善天祥一首

須溪劉會子孟辰翁

原四首樊樹增一首

善甫杜二首

玉霄滕賓六首

魯齋許衡仲平三首

中齋鄧光薦中甫

三首案鄧光薦名剡中甫二字疑衍

西菴楊二首

案楊西菴名果

天遊詹玉可大九首

九皋司馬昂夫三首

巽吾彭元遜二十首

通甫曹一首

信卿高一首

醉菴謝四首

卷中二十五人詩六十八首

壺秋羅志仁七首

江村姚雲文原八首樊樹楷一首

青山趙文九首

樵雲楊三首

梅溪李琳三首

梅洞宋遠一首

玉霄滕賓一首原本缺

秋陽周景一首

養吾劉將孫一首

高峯蕭烈一首

青原劉一首原本誤在韜華翁之後今改正

竹澗王學文一首

橫舟曾秉一首

晚山趙功可八首

水村黃一首

復之危一首

小翁姜一首

華翁鞠一首

芳遠彭一首

山隱戴一首

裕翁李一首

端是龍一首

東父蕭一首

吟竹顏子俞原二首樊榭增四首今又增一首

山樵王從叔五首原本此下有彭履道刪去

卷下 二十四人計七十三首

靜得王夢應原二首樊榭增二首

山庭吳元可四首

鼎玉劉 鉉三首

太古李五首

履道彭三首原本在會允元之後說

蓬齋黃子行六首

紫蓬龍一首

竹屋蕭允之六首

吟所蕭漢傑四首

癩融段宏章一首原本缺

柱所劉貴翁一首

霽宇黃一首原本缺

梅邊王鼎翁一首

雲閑劉六首

半湖張二首原本缺

溪山劉四首

霽海周二首

琴泉尹二首

仁飛李天驥一首原本缺

定叟劉一首

梅心周三首

澗民尹五首

會心彭三首

鷗江曾四首

上中下三卷計六十三人共詞二百三首以讀畫齋刊本冬讀
書齋嚴氏手鈔厲樊榭本合校重加勘定嘉慶辛未春閏三月
秦伯敦父識

精選名儒草堂詩餘卷上

廬陵鳳

太保劉公

頤德○初名佩。字仲晦。其先瑞州人。參領中書省事。遂家焉。至元二年拜光祿大夫。太保。參領中書省事。

更名秉忠。詔翰林學士。贊。女。妻之。賜第。奉先坊。齋居蔬食。澹然不異。平昔書得魯公法。行草獨。師二王。自號蕤春散人。


有集十卷。

木蘭花慢 混一後賦

望乾坤浩蕩。曾際會好風雲。想漢鼎初成。唐基始建。生物如春。東風吹徧原野。但無言紅綠自紛紛。一作芬。花月留連醉客。江山憔悴醒人。

龍蛇一屈一還伸。未信喪斯文。復上古淳風。先王大典。不費經綸。天君幾時揮手。倒銀河直下洗羣塵。鼓舞五華鸞鷲。謳歌一角麒麟。

朝中措 書懷



布衣藍縷曳無裙。十載苦看書。別有照人光彩。驪龍吐出明珠。天
人學業。風雲氣象。可困泥塗。隨著傅巖霖雨。大家濟潤焦枯。

魯齋許衡仲平 中原

滿江紅 別大名親舊

河上徘徊。未分袂。孤懷先怯。中年後。此般憔悴。怎禁離別。淚苦滴成
襟畔溼。愁多擁就。心頭結。倚東風。搔首謾無聊。情難說。黃卷內。消
白日。青鏡裏。增華髮。念歲寒交友。故山烟月。虛道人生歸去好。誰知
美事難雙得。計從今。佳會幾何時。長相憶。

又 書懷

親友留連。都盡道。歸程匆逼。還可慮。干戈搖蕩。路途艱阨。萬事豈容
忙裏做。一安惟自閒中得。便相將。妻子抱琴書。青山側。行與止。吾
能識。成與敗。誰能測。但粗衣淡飯。小窗容膝。桑柘安排投老地。詩書

淮備傳家集。便蘇張重起論縱橫。心難易。

沁園春

壘田東城

月落簷西。日出籬東。曉枕睡餘。喚老妻忙起。晨飡供具。新炊藜糝。舊
腌鹽蔬。飽後安排。城邊墾圃。要占蒼烟千畝居。閒談裏。把從前荒穢。
一日驅除。爲農換却爲儒。任人笑。謀身拙更迂。念老來生業。無他
長技。欲期安穩。敢避崎嶇。達士身名。豪一作貴家驕蹇。此好胸中一點
無。歡然處。有膝前兒女。几上詩書。

文山文天祥

廬陵

沁園春

至元閒留燕山作

爲子死孝。爲臣死忠。死又何妨。自光岳氣分。士無全節。君臣義缺。誰
負剛腸。罵賊睢陽。愛君許遠。留得聲名萬古香。後來者。無二公之操。
百鍊之鋼。人生翕歛云亡。好烈烈轟轟做一場。使當時賣國。甘心

降虜受人唾罵。安得流芳。古廟幽沈。遺容儼雅。枯木寒鴉。幾夕陽。郵亭下。有奸雄過此。仔細思量。

中齋鄧光薦

滿江紅

和王昭儀題壁

王母仙桃。曾親醉五雲春色。誰信道鹿銜花去。浪翻鼇闕。眉鎖嬌蛾。山宛轉。髻梳墮馬雲。歎側。恨風沙吹透漢宮衣。餘香歇。霓裳散。庭花滅。斜陽燕。應難說。想春深銅雀。夢殘啼血。空有琵琶傳出塞。更無環珮鳴歸月。又爭知有客夜悲歌。壺敲缺。

唐多令

雨過水明霞。潮回岸帶沙。葉聲寒飛透窗紗。堪恨西風吹世換。更吹我落天涯。寂寞古豪華。烏衣日又斜。說興亡燕入誰家。惟有南來無數雁。和明月宿蘆花。

浪淘沙

疏雨洗天清。枕簟涼生。井梧一葉做秋聲。誰念客身輕似葉，千里飄零。夢斷古臺城。月淡潮平。便須攜酒訪新亭。不見當時王謝宅，烟草青青。

須溪劉辰翁

蘭陵王

丙子送春

送春去。春去人閒無路。秋千外、芳草連天。誰遣風沙暗南浦。依依甚意緒。謾憶海門飛絮。亂鴉過、斗轉城荒。不見來時試燈處。春去最誰苦。但箭雁沈邊。梁燕無主。杜鵑聲裏長門暮。想玉樹凋土。一作霜淚盤如露。咸陽送客，屢回顧。斜日未能渡。春去。尙來否。正江令恨別。庾信愁賦。蘇隄盡日風和雨。歎神遊故國。花記前度。人生流落。顧孺子。共夜語。

大酺 春寒

任瑣窗深。重簾閉。春寒知有人處。常年笑花信。問東風情性。是嬌是妬。冰柳成須。吹桃欲削。知更海棠堪否。相將燕歸又。看香泥半雪。欲歸還誤。謾低回芳草依稀。寒食朱門封絮。少年慣羈旅。亂山斷。樹喚船渡。正暗想雞聲落月。梅影孤屏。更夢衾千重似霧。相如倦遊去。掩四壁。淒其春暮。休回首。都門路。幾番行曉。箇箇阿嬌深貯。而今斷烟細雨。

寶鼎現 丁酉元夕

紅妝春騎踏月。花影牙旗穿市。望不盡樓臺歌舞。習習香塵蓮步底。簫聲斷。約綵鸞歸去。未怕金吾呵醉。甚輦路喧闐且止。聽得念奴歌起。父老猶記宣和事。抱銅仙清淚如水。還轉盼沙河多麗。滉蕩明光連邸第。簾影動。散紅光成綺。月浸蒲桃十里。看往來神仙才子。肯

把菱花撲碎。腸斷竹馬兒童。空見說三千樂指。等多時春不歸來。到春時欲睡。又說向燈前擁髻。暗滴鮫珠墜。便當日親見霓裳。天上人間夢裏。

謁金門

風又雨。春事自無多許。欲待柳花團作絮。柳花冰未吐。翠袖不禁春誤。沈却綠烟紅霧。將謂花寒留得住。一晴春又暮。

意難忘 元宵雨

角動寒譙。看雨中燈市。雪意瀟瀟。星毬明戲馬。歌管雜鳴刁。泥沒膝。舞停腰。燄蠟任風消。更可憐紅啼桃檻。綠暗楊橋。當年樂事朝朝。曾錦鞍呼妓。金屋藏嬌。圍香春命酒。坐月夜吹簫。今老矣。倦歌謠。嫌殺杜家喬。謾三盃踞爐覓句。斷送春宵。見劉應李翰墨全書補上

楊西菴 中原

太常引 送商參政西行

一杯聊爲送征鞍。落葉滿長安。誰料一儒冠。直推上淮陰將壇。西風旌旆，斜陽草樹，雁影入高寒。且放酒腸寬。道蜀道而今更難。

又

長淵西去接連昌。無日不花香。雲雨楚山娘。自見了教人斷腸。中幽恨，曲中私語，孤鳳怨離凰。剛待不思量。兀誰管今宵夜長。 絃

杜善夫 中原

太常引

碧幘冰簟午風涼。都是好風光。獨自守空牀。淚滴了千行萬行。別時情意去時言。約剛道不思量。不是不思量。說著後教人語長。

朝中措

汴梁三月正繁華。行路見雙娃。遍體一身明錦，遮塵滿面烏紗。車

鞍似水。留伊無故。去落誰家。爭奈無人說與。新來憔悴因他。

天遊詹玉可大 古鄂

霓裳中序第一

似元間監醜長春宮。偶見羽士文室古鏡狀。似秋葉背有金刻宣和玉寶四字。有感因賦。

一規古蟾魄。瞥過宣和幾春色。知那箇柳鬆花怯。曾搓玉團香。塗雲抹月。龍章鳳刻。是如何兒女消得。便孤了翠鸞何限。人更在天北。磨滅古今離別。幸相從。薊門仙客。蕭然林下秋葉。對雲淡星疎。眉青影白。佳人已傾國。贏得癡銅舊畫。興亡事。道人知否。見了也華髮。

漢宮春 題西山玉隆宮

吟髮蕭蕭。正古槎秋入。河漢銀濤。紅葉甚家院落。一片笙簫。晉時言語。問何人還肯逍遙。知幾度落花啼鳥。鄉歌猶在兒曹。游帷舊時明月。照滿庭空翠。翦翦春梢。西山笑人底事。流浪官袍。江湖近日。□□□□□□□□□□
據譜應一字。神仙多在漁樵。千古意。水沈香裏。□□□□□□□□□□
元刻缺六字。曝書亭

同本

多麗 念念

晚雲歸。小樓又作陰涼。霎時間恨同招雨。西風葉葉商量。醒時心。又還南浦。愁邊句。多在斜陽。菱梳籠青。蓮瓶拖豔。旋傾花水。嚙茶香。怨蛩有許多言語。說動軟心腸。夜沈沈。幾條涼月。界破晴窗。共繡簾吹絮未久。却孤劍水雲鄉。自家書未能成字。鄰家笛且莫吹商。好夢偏慳。閒情未了。隔牆又唱謝秋娘。怕綃依舊時香摺。戲封做書囊。鴛鴦字。見時千萬。繡一雙雙。

桂枝香 題寫韻軒

紫薇花露。瀟灑作涼雲。點商句羽。字字飛仙。下筆一簾風雨。江亭月觀。今如許。嘆飄零墨香千古。夕陽芳草。落花流水。依然南浦。甚兩兩凌風駕虎。任天孫標致。月娥眉嫵。一笑生春。那學世間兒女。筆牀

硯滴曾窺處。有西山青眼如故。素牋寄與。玉簫聲徹。鳳鳴鸞舞。

渡江雲 春江雨宿

拖陰籠晚暝。商量清苦。陣陣打篷聲。分明都是淚。不道今宵。篷底有離人。松濤搖睡。夢不穩。難溼巫雲。幾點兒。淚痕跳響。休要醒時聽。銷魂。燈下無語。口口梨花。掩重門。夜永。應是添傷春滋味。中酒心情。東風湖上香泥軟。明日去。天色須晴。相見好。綠楊沽酒旗亭。

三姝媚

古衛舟人謂此舟
會載錢塘官人。

一篷兒別苦。是誰家花天。月地兒女。紫曲藏嬌慣。錦窠金翠。玉漱鍾呂。綺席傳宣。笑聲裏龍樓三鼓。歌扇題詩舞。袖籠香。幾曾塵土。因甚留春不住。怎知道人閒。匆匆今古。金屋銀屏。被西風吹換。蓼汀蘋渚。如此江山。應悔却西湖歌舞。載取斷雲何處。江南烟雨。

一萼紅

泊沙河。月鉤兒挂浪。驚起兩魚梭。淺碧依痕。嫩涼生潤。山色輕染修
蛾。釣船在綠楊陰下。暮聽得船底有吳歌。一段風情。西湖和靖。赤壁
東坡。往事水流雲去。嘆山川良是。富貴人多。老樹高低。疎星明淡。
只有今古銷磨。是幾度潮生潮落。甚入海空只恁風波。閒著江湖儘
寬。難覓誰一作肯漁蓑。

齊天樂

贈童護天
兵後歸杭

相逢喚醒京華夢。吳塵暗斑吟髮。倚擔評花。認旗沽酒。歷歷行歌奇
跡。吹香弄碧。有坡柳風情。逋梅月色。畫鼓紅船。滿湖春水斷橋客。
當時何限俊侶。甚花天月地。人被雲隔。却載蒼烟。更招白鷺。一醉修
江又別。今回記得。再折柳穿魚。賞花催雪。如此湖山。忍教人更說。

阮郎歸

閨情

斜河一道界相思。好秋都上眉。鸞牋象管寫心啼。搦愁題做詩。添

別恨。卜歡期。燈花紅幾時。看看月上小窗兒。夜香今夜遲。

玉霄滕賓 天台

洞仙歌 送張宗師捧香

醉騎黃鶴。飛下紅雲島。鐵笏吹寒洞天曉。被人閒識破。惹起虛名。驚宇宙。一笑天高月小。仙槎人去後。殿上班頭。除却洪崖總年少。看天香袖裏。散作東風。吹不斷。海北天南都到。試容我從遊五陵間。便吹落一作蒼寒。一蓑烟釣。

最高樓 呈管竹樓左丞

梅花月。吹老角聲寒。劍氣拂雲端。台星纔入朝天闕。將星旋出破烟蠻。牛年來。勳業事。笑談閒。誰更說元龍樓下臥。誰更說元規樓上坐。終不似。竹樓寬。有時呼酒摘星斗。有時提筆撼江山。問何如。容此客。倚闌干。

歸朝歡

畫角西風轟萬鼓。猶憶元戎談笑處。鐵衣露重劍光寒。海波飛立魚龍舞。匆匆留不住。萬里玉關如掌路。空悵望夕陽暮靄。人立渡傍渡。木落山空人掩戶。得似舊時春色否。雁聲呼徹楚天低。玉驄嘶入烟雲去。無人憑說與梅花。淚老愁如雨。猶記得顛崖如此。細向席前語。

玉漏遲

七夕行臺
謝公見錢

問誰爭乞巧。誰知巧處成煩惱。天上佳期。底事別多歡少。雨夢雲情半晌。又早被西風吹曉。愁未了。星橋隔斷。銀河深杳。可笑兒女浮名。似瓜果絲縈繞。百拙無能。贏得自家華皓。我笑姮娥解事。但歲歲孤眠空老。歸去好。江上綠波烟草。

鵲橋仙

斜陽一抹，青山數點，萬里澄江如練。東風吹落檣聲寒，又喚起寒雲一片。殘鴉古渡，荒鷄村店，漸覺樓頭人遠。桃花流水小橋東，是那箇柴門半掩。

點絳脣 墨本水仙

繡袂啼香，爲誰一滴春心碎。淡黃淺翠，不似當時態。東洛繡塵，依舊交情耐。空憔悴。玉人何在，細雨疎烟外。

九皋司馬昂父 大行畏吾兒

最高樓 九日

登高癩。且平地過重陽。風雨又何妨。問牛山悲淚，又何苦。龍山佳會，又何狂。笑淵明，便歸去。一作歸去來又何忙。也休說玉堂金馬樂。也休說竹籬茅舍惡。花與酒，一般香。西風莫放秋容老，時時留待客徜徉。便百年，渾是醉，幾千場。

又暮春

花信緊。二十四番愁。風雨五更頭。侵階苔蘚宜羅襪。逗衣梅潤試香
篝。綠窗閒。人夢覺。鳥聲幽。按銀箏學弄相思調。寫幽情恨。殺知音
少。向何處。說風流。一絲楊柳千絲恨。二分春色二分休。落花中。流水
裏。兩悠悠。

太常引

題朝宗亭督孟博早歸

冷烟千頃釀寒威。曉霜重壓征衣。休教六花飛。憶尚有遊人未歸。
江空歲晚。故園秋老。行色莫依違。特地與君期。趁南浦尊鱸正肥。

巽吾彭元遜 禾川

漢宮春 元夕

十日春風。又一番調弄。怕暖愁陰。夜來風雨。搖得楊柳黃深。熏篝未
斷。夢舊寒殘。醉同衾。便是聞一作關燈見月。看花對酒。驚心。攜手滿

身花影。香霏冉冉。露溼羅襟。笙歌殢人歸去。回首沈沈。人間此夜。誤春光一刻千金。明日問紅巾青鳥。蒼苔自拾遺簪。

滿江紅 牡丹

翠袖餘寒。早添得銖衣幾重。何須怪妍華都謝。更爲誰容。銜盡枯花。成鹿苑。人間不恨雨和風。剩一枝流落到人家。清淚紅。山霧溼。倚熏籠。垂匭葉。鬢酥融。恨官雲一朶。飛過崆峒。白日長閒青鳥在。楊家花落白蘋中。問故人。忍更負東風。樽酒空。

解珮環 尋梅不見

江空不渡。恨蘼蕪杜若。零落無數。遠道荒寒。婉婉流年。望望美人遲暮。風烟雨雪陰晴晚。更何須春風千樹。儘孤城落木蕭蕭。日夜江聲流去。日晏山深聞笛。恐他年流落。與子同賦。事關心違。交淡媒勞。蔓草沾衣多露。汀洲窈窕餘醒寐。遺珮環浮沈澧浦。有白鷗淡月微

波。寄語逍遙容與。

徵招

和煥甫秋聲君有遠遊之興。爲道行路難以感之。

人閒無欠秋風處。偏到霜痕月杪。細雨船篷。日夜風波未了。忽潮生海立。又天闊江清欲曉。孤迥幽深。激揚悲壯。浮沈浩渺。行路古來難。貂裘敝。匹馬關山人老。錦字未成。寒到君邊書到。料倚門回首。更兒女燈前。嬉笑。早斟酌萬里封侯。怕鏡霜催照。

子夜歌 和尙友

視春衫篋中半在。浥浥酒痕花露。恨桃李隨風過盡。夢裏故人如霧。臨穎美人。秦川公子。晚共何人語。對誰家花草池臺。回首故園。咫尺未成歸去。昨夜宵一作宵。聽危絃急管。酒醒不知何處。飄泊情多。衰遲感易。無限堪憐許。似尊前眼底。紅顏消幾寒暑。年少風流。未諳春事。追與東風賦。待他年君老。巴山共君聽雨。

臨江仙

紅袖烏絲失酒。金釵銀燭銷春。柳邊桃下復清晨。帽風回馬旋。扇雨
拂花情。白帝空驚舊曲。陽關只夢行人。碧雲何處認芳塵。紫荊花
作菜。青杏核生仁。

又

自結牀頭塵尾。角巾坐枕孤松。片雲承日過山東。起聽荷葉雨。行受
豆花風。無客同羹蓴菜。有人爲剝蓮蓬。東牆年少未從容。何因知
我意。吹笛月明中。

瑞鷓鴣

背人西去一鶯啼。拍手還驚百舌飛。淺雨微寒春有思。宿妝殘酒欲
飲時。鶉鶉浪起蒲茸暖。翡翠風來柳絮低。故遣蒼頭尋杏子。恁肩
小語只心知。

又

東洲游伴寄蘭若。人日晴時不用招。微雨來看楊柳色。故人相遇浴龍橋。愁如春水年年長。老共東風日日消。幾欲作牋無可寄。雙魚猶自等歸潮。

蝶戀花

微雨燒春餘潤氣。新綠愔愔。乳燕相依睡。無復卷簾知客意。楊花更欲因風起。舊夢蒼茫雲海際。強作歡娛。不覺當年似。曾笑浮花併浪蘂。如今更惜棠梨子。

又

日晚遊人酥粉流。四面亭前。面面看花坐。扇拂游蜂青杏墮。新紅一路秋千過。簾外清歌簾底和。自理琵琶。不用笙簧佐。八摺香羅餘碧唾。露花點筆輕題破。

如夢令

今夜故人獨宿。小雨梨花當屋。猶有未殘枝。輕脆不堪人觸。休觸休觸。憔悴怕驚郎目。

菩薩蠻

玉蛇躑躅流光卷。連珠合杏簾波遠。花動見魚行。紅裳眩欲傾。人來驚翡翠。小鴨驚還睡。兩岸綠陰生。修廊時聽鶯。

謁金門

春一點。透得酥溫玉軟。昏暈唾花連袖染。嫣紅驚絕豔。日暮飛紅撲臉。翠被夜寒波點。夢斷錦茵成墮靨。官廊微月轉。

月下笛

江上行人。竹閒茅屋。下臨深窈。春風嫋嫋。翠鬟窺樹猶小。遙迎近倚。歸還顧。分付橫枝未了。扁舟却去中流。回首驚散飛鳥。重踏新亭。

展齒歌山抱。孤城月來華表。雞聲人語。隔江相伴歌笑。壯遊歷歷同
高李。未擬詩成草草。長橋外。有醒人吹笛。併在霜曉。

六醜 楊花

似東風老大。那復有當時風氣。有恨難收。情一本作有。情不
定。據詩當作仄。又作有

平。江山身是寄。浩蕩何世。但憶臨官道。暫來不住。便出門千里。癡心

指望迴風墜。扇底相逢。釵頭微綴。他家萬條千縷。解遮亭障驛。不隔

江水。瓜洲曾艤。等行人歲歲。日下長秋。城烏夜起。帳廬好黏。在一當作

聲。仄。春睡。共飛歸湖上。草青無地。惜惜雨。春心如膩。欲待化豐樂樓

前。帳飲青門都廢。何人念。流落無幾。點點一作幾搏作雪。懸鬆潤。爲

君哀淚。

隔浦蓮近

夜寒晴早人起。見柳知新翠。撼樹試花意。兩蜂狂。救墮藥。見著羞懶

避春都在時節到愁地。屏閒字。香痕半搯。誤期一一曾記。朱絃謾鎖。不會近番慵脆。強踏秋千似醉裏。扶下。眼花跼跼飛墜。

憶舊遊

記新樓試酒。上客回車。初識能歌。幾許憐才意。覺援琴意動。投簡情多。青鸞晝下。縹緲煙霧隔輕羅。還怕有人猜。素巾承汗。微影雙蛾。西陂。千樹雪。欲絕世乘風。下照滄波。怪倚春憔悴。口扁舟月上。草草相過。少年翰墨相誤。幽恨媿星河。誰爲語伶元。秋風併冷雙燕窠。

生查子

癡多故惱人。妝晚翻嫌趣。祇爲眼波長。嗔笑嬌難觸。春心不肯深。春睡何曾足。莫待柳花飛。飛去無拘束。

玉女迎春慢

柳

淺入新年。逢人日。拂拂淡煙無雨。葉底嬌禽自語。小啄幽香還吐。東

風辛苦。便怕有踏青人誤。清明寒食。消得渡江。黃翠千縷。看臨小帖宜春。填輕暈。溼碧花生霧。爲說釵頭裊裊。繫著輕盈不住。問郎留否。似昨夜。教成鸚鵡。走馬章臺。憶得畫眉歸去。

曹通甫 中原

木蘭花慢 白蓮

愛幽花帶露。映曉色。淡秋塘。恨太華峯高。廬山社遠。身世相妨。誰知半溪烟景。且乘閒。華髮照滄浪。羨殺風標公子。一生何限清香。仙家搖曳水雲鄉。高韻却濃妝。看脈脈盈盈。何消解語。已斷人腸。呼童更須沽酒。待夜涼。和月捲荷觴。明日醒來信筆。新聲付與秋娘。

高信卿 中原

大江東去 滕王閣

閒登高閣。歎興亡滿目。風烟塵土。畫棟珠簾當日事。不見朝雲暮雨。

秋水長天。落霞孤鶩。千載名如故。長空淡澹。去鴻嘹唳。誰數。遙憶
才子當年。如椽健筆。坐上題佳句。物換星移。知幾度。遺恨西山南浦。
往事悠悠。昔人安在。何處尋歌舞。長江東注。爲誰流盡。今古。

謝醉菴 中原

臨江仙

中書右丞王公。行臺揚州。公于平陽鄉里也。吾友張鵬翼往依焉。于其行。歌以送之。二首。

淮海東南佳麗地。古今畫品詩題。羨君去意拂晴霓。腰錢期跨鶴。舞
劍異聞鷄。自笑病來成老癩。飛沈杳隔雲泥。他時相憶此分攜。月
明歸雁過。花落子規啼。

又

白髮壯心還未減。春風夢遶揚州。青山隱隱水悠悠。征帆從蕩漾。行
李亦風流。向日侍郎今右相。元龍豪氣橫秋。月明千里鎮淮樓。依
然青眼舊。應不負依劉。

鷓鴣天

睡思才消賴有茶。老懷剛慰奈無花。花隨流水三春盡。柳礙東風一向斜。
憐病久，怯春寒。一作多。莫雲庭院噪歸鴉。碧雲草就關心句。信到吟詩解歎嗟。

浣溪沙 贈琴娃

沈屑微熏睡鴨金。朱絃還解解芳心。盈盈桃李未春深。天上鸞膠須著意。人間鳳曲有知音。莫教風雨綠成陰。

精選名儒草堂詩餘卷中

壺秋羅志仁 徐川

金人捧露盤

錢塘懷古壩
作丙午錢壩一

溼苔青。妖血碧。壞垣紅。怕精靈來往相逢。荒烟瓦礫。寶釵零亂。隱鸞龍。吳峯越巘。翠鬢鎖若爲誰容。浮屠換。昭陽殿。僧磬改。景陽鐘。興亡事。淚老金銅。驪山廢盡。更無宮女說元宗。海濤落月。角聲起。滿眼秋風。

霓裳中序第一 四聖觀

來鴻又去燕。看罷江潮收畫扇。湖曲雕闌倚倦。正船過西陵。快篙如箭。凌波不見。但陌花遺曲淒怨。孤山路。晚蒲病柳。淡綠鎖深院。離

誰一作

恨

據藩換頭二字當押短韻此作六字一句恐誤或是憶字之譌

五雲宮殿。記舊日曾遊翠輦。

青紅如寫便面。下鵝池荒。放鶴人遠。粉牆隨岸轉。漏碧瓦殘陽一線。
蓬萊夢。人間那信。坐看海濤淺。

風流子 汎湖

歌咽翠眉低。湖船客。尊酒謾重攜。正斷續齋鐘。高峯南北。飄零野褐。
太乙東西。淒涼處。翠連松九里。曾馬濺障泥。葛嶺樓臺。夢隨烟散。吳
山宮闕。恨與雲齊。靈峯飛來久。飛不去。有落日斷猿啼。無限風荷
廢港。露柳荒畦。岳公英骨。麒麟舊冢。坡仙吟魄。鶯燕長隄。欲弔梅花
無句。素壁慵題。

據譜。岳公上當增一字。
例作上一下四句法。

揚州慢

危榭摧紅。斷磚埋玉。定王臺下園林。聽牆竿燕子。訴別後驚心。儘江
上青峯好在。可憐曾是。野燒痕深。付瀟湘漁笛。吹殘今古銷沈。妙
奴不見。縱秦郎誰更知音。正雁妾悲歌。雕奚醉舞。楚戶停砧。化碧舊

愁何處。魂歸些。晚日陰陰。渺雲平鐵壘。淒涼天也沾襟。

虞美人 帶蕊泥

君王曾惜如花面。往事多恩怨。霓裳和淚換袈裟。又送鸞輿北去聽琵琶。
當年未削青螺髻。知是歸期未。天花丈室萬緣空。結綺臨春。何處淚痕中。

木蘭花慢 禁醴

漢家糜粟詔。將不醉飽生靈。便收拾銀瓶。當壚人去。春歇旗亭。淵明權停種秫。遍人間暫學屈原醒。天子宜呼李白。婦人却笑劉伶。提葫蘆更有誰聽。愛酒已無星。想難變春江。蒲桃釀綠。空想芳馨。溫存鷓鴣鸚鵡。且茶甌淡對晚山青。但結秋風漁夢。賜醕依舊沈冥。
至元四年三月。以冬無雨雪。春澤未繼。問便民之事。於翰林國史院。詳錄姚樞。王壽。賈。等。對曰。足民之道。惟節淫費。靡穀之多。無如。醴。釀。醴。家。宜。一。切。禁。止。從。之。五。月。申。嚴。大。部。酒。禁。犯。者。籍。其。家。貲。散。之。貧。民。諸。人。作。禁。釀。詞。蓋。此。時。也。屬。鷓。記。其。

菩薩蠻慢

曉鶯催起。問當年秀色。爲誰料理。悵別後屏掩吳山。便樓燕月寒。鬢
蟬雲委。錦字無憑。付銀燭盡燒千紙。對寒泓靜碧。又把去鴿。往恨都
洗。桃花自貪結子。道東風有意。吹送流水。謾記得當日心嫁卿卿。
是日暮天寒。翠袖堪倚。扇月乘鸞。儘夢隔嬋娟千里。到嗔人。從今不
信。畫簷鵲喜。羅志仁題趙榮祿水村圖詩。長愛秦郎絕妙詞。荒寒
暗合朝川詩。斜陽萬點寒鴉處。流水孤村又一奇。

江村姚雲文 古銘

摸魚兒 良岳

渺入閒蓬瀛何許。一朝飛入梁苑。輞川梯洞層崖出。猶帶鬼愁龍怨。
窮遊宴。談笑裏。金風吹折桃花扇。翠華天遠。悵莎沼螢黏。錦屏烟合。
草露泣蒼蘚。東華夢。好在牙檣瑯瑯。畫圖歷歷曾見。落紅萬點孤
臣淚。斜日牛羊春晚。摩雙眼。看塵世。鼇宮又報鯨波淺。吟鞭拍斷。便

乞與媧皇化成精衛。填不盡遺憾。

玲瓏玉

半閑堂賦春雪。此擬雲文自度曲。

開歲春遲。早贏得一白瀟瀟。風窗浙籟。夢驚鴛鴦一作。帳春嬌。是處貂裘透暖。任樽前回舞。紅倦柔腰。今朝。虧陶家茶鼎寂寥。料得東皇戲劇。怕蛾兒街柳。先鬪元宵。宇宙低迷。倩誰分淺凸深凹。休嗟空花無據。便真箇瓊雕玉琢。總是虛飄。且沈醉。趁樓頭雲片未消。且一本醉

上多疊虛飄二字。

木蘭花慢

清明後賞牡丹

笑花神較癩。似忘却趁清明。更油幄晴慳。筠菴寒淺。溼重紅雲。東君似憐花透。環碧帷一作翠幃。遮住怕渠驚。惆悵犢車天遠。綠楊深閉重城。香名。誰誤娉婷。曾注譜。上金屏。問洛中亭館。竹西歌吹。人醉花醒。且莫煎酥澆却。一枝枝封蠟。付銅餅。三十六宮春在。人間風雨無情。

紫萸香慢

九日自度此曲

近重陽。徧多風雨。絕憐此日。暄明。問秋香濃未。待驪客出西城。正自
羈懷多感。怕荒臺高處。更不勝情。向尊前。又憶。漉酒插花人。只坐上
已無老兵。淒清。淺醉還醒。愁不肯。與詩平。記長楸走馬。雕弓擘柳。
前事休評。紫萸一枝傳賜。夢誰到。漢家陵。儘烏紗便隨風去。要天知
道。華髮如此。星星。歌罷涕零。

洞仙歌

燕窠香溼。誤天涯芳信。近社陰晴未前定。聽鶯簧宛轉。似羽凝宮。歌
未斷。落落舊愁都醒。疎狂進少日。杜曲樊樓。拚把黃金買春恨。回
首武陵溪。花待郎歸。洞雲深。未知春盡。問楊柳。榆頭幾分春。消不得
朝來。雨寒一陣。

齊天樂

柳花引過橫塘路。縈回曲溪通浦。插槿編籬。挨梅砌石。次第海棠成
塢。吟筇獨拄。待尋訪斜橋。水邊窺戶。已約青山。雲深不礙客來處。
繁華閱人無數。問舊日平原。疑作君還知否。啼鳥窗幽。晝陰人寂。慵
困不如飛絮。匆匆燕語。似迎得春來。且留春住。惜取名花。一枝堪寄
與。

蝶戀花

春到海棠花幾信。埃館餘寒。欲雨征衣潤。燕認杏梁棲未穩。牡丹忽
報清明近。恨入青山連曉鏡。香雪柔酥。應被春消盡。繡閣深深人
半醒。燭花貼在金釵影。

如夢令

昨夜佳人憑酒。隔著羅衾厮守。聽徹五更鐘。陡覺霜飛寒透。却又却
又。陪笑倩人溫手。

八聲甘州 蕙波

卷絲絲雨織半晴天。擢歌發清舷。甚蒼虬怒躍。靈鼉急吼。雪湧平川。
樓外榴裙幾點。描破綠楊烟。把畫羅遙指。助嘯爭先。惟悴潘郎。曾
記得青龍千舸。采石磯邊。歎內家帖子。閒却縷金箋。覺素標插頭如
許。儘風情終不似鬪羸船。人聲斷。虛齋半掩。月映枯禪。文天集下同

青山趙文儀可 廬陵

綺寮怨 題寫韻軒

絳闕珠宮何處。碧梧雙鳳吟。爲底事一落人間。輕題破隱韻。天音當
時點。雲滴雨。匆匆處。誤墨沾素襟。算人間最苦多情。爭知道。天上情
更深。世事似晴又陰。羅襦甲帳。回頭一夢難尋。虎嘯嶽嶽。護遺跡。
尙如今。斜陽落花流水。吹紫宇。淡成林。霜空月明。天風響環珮。飛翠
禽。

疎影

道士未復古善彈琴爲余言琴須帶拙聲若太巧卽與箏阮何異余賞其言爲賦此

寒泉濺雪。有珮環隱隱。飛度明月。易水風寒。壯士悲歌。關山萬里離別。楊花浩蕩。晴空轉。又化作雲鴻霜鶻。耿石壕夜久無言。寂歷如聞幽咽。雲谷山人老矣。江空又歲晚。相對愁絕。玉立長身。自是胎仙。舞我黃庭三疊。人間只慣丁當字。妙處在一聲清拙。待明朝試拂菱花。老我一簪華髮。案愚見紀忘云。趙公此詞。知琴音者。寒泉濺雪。有悲歌。關山萬里離別。此楚歌一曲。句別之聲。揚花浩蕩。東風轉。此汎聲也。又化作雲鴻霜鶻。此秋鴻一曲之聲也。夜久無言。寂歷如聞幽咽。此濼涼調。明妃引之曲也。雲谷山人老矣。江空又歲晚。相對愁絕。此度關山。倚蘭操等曲調聲也。自是胎仙。舞我黃庭三疊。此鶴鳴九皋。此之音也。如趙者。其知琴士也。若以此調爲箏琶之音。則謬矣。

瑞鶴仙

劉氏園西湖柳

綠楊深似雨。西湖上。舊日愁情。一作絲恨縷。風流似張緒。羨春風依舊。年年眉嫵。官腰楚楚。倚畫闌。會鬪妙舞。想而今似我。零落天涯。却悔

相妬。痛絕長秋一作別後揚白菴飛。舊隘誰譜。年光暗度。淩涼事。不堪訴。記菩提寺路。段家橋水。何時重到夢處。况柔條老去。爭奈繫春不住。

法駕導引

壽雲岩師三首

雲漠漠。雲漠漠。深擁紫皇家。岩上神仙無一事。幅巾臨水看桃花。點點是丹砂。

又

山中好。山中好。長日養嬰兒。午夜獨行金闕路。晴窗自寫綠章詞。聞有鶴相隨。

又

公度我。公度我。我是漢銅仙。借我玉龍爲轂轡。爲公鋤雨種芝田。留眼看千年。

八聲甘州

和孔瞻懷信國公
韻。因念亦周弟。

是去年春草又萋萋。塵生縷金衣。悵朱顏爲土，白楊堪柱，燕子誰依。
謾說漫漫六合，無地著相思。遼鶴歸來後，城亦全非。更有延平一
劍，向風雷夜半，何處尋伊。怪天天何物，堪作玉彈碁。到年年無腸堪
斷，向清明獨自掩荆扉。何況又禽聲杜宇，花事酴醾。

塞翁吟

黃園感事

又海棠開後，樓上倍覺春寒。綠葉潤，雨初乾。愛遠樹團團。當時贖買
名花種，那信付與誰看。十載事，土花漫。但青得闌干。悲歡。思人世
真如一夢，留不住城頭日殘。看眼底西湖過了，又還見趙舞燕歌，抹
粉塗丹。憑君更酌，後日重來，直是晴難。

鳳凰臺上憶吹簫

轉宮商

白玉磋成，香羅捻就，爲誰特地團團。羨司花神女，有此清閒。疑是宮

鞦韆蹴鞠。剛剛踢誤。桂花閒。方信道。醅釀失色。玉藥無顏。凭闌。幾回
淡月。怪天上。冰輪移下。塵寰。奈堪同玉手。難插雲鬟。人道轉官毬也。
春去也。欲轉何官。聊寄與詩人。案頭冰雪相看。

（原本空白十六行每行二十一字）

楊樵雲 徐川

滿庭芳 影

只道空烟。又疑流水。依依却是行雲。了然相對。又是夢紛紛。半面春
風。圖畫黃金在。難鑄昭君。溪橋斷。梅花晴雪。端的白三分。眞眞難
喚醒。三年抽藕。織得榴裙。甚徘徊。窺鏡。交翼鸞文。一片飛花來去。并
刀快。翦取情紋。無情處。分明著眼。強半滯春醺。

水龍吟 夢

多情不在分明。繡窗日日花陰午。依依雲絮。溶溶香雪。覩他尋路。一滴東風。怎生消得。翠苞紅褪。被疎鐘敲斷。流鶯喚起。但長記、弓彎舞。定是相思入骨。到如今、月痕同醉。教人枉了。若還真箇。匆匆如此。全未惺鬆。纈紋生眼。胡牀猶據。算從前、總是無憑。待說與、如何寄。

小樓蓮苑

梅

一枝斜墮牆腰。向人顛裏如相媚。是誰翦取。斷雲零玉。輕輕妝綴。不是幽人。如何能到。水邊沙際。又匆匆過了。春風半面。儘長把重門閉。只管相思成夢。道無情又關鄉意。蒼苔半畝。如今已是。鹿胎田地。甚欲追陪。却嫌花下。翠環解語。待何時。月轉幽房。醉了不教歸去。

梅溪李琳

長沙

滿江紅

題宜春臺

碧蘸江山。鶴唳曉雲獻畫屏。瑤宮敞舞。金翔翠。巍枕春城。龍背神瓢

飛旱雨。虹光炫石。轉陰晴。藹畫香飛。霧福蒼生。千古靈。簫鸞響。笙鶴鳴。瑞烟起。彩雲行。滿闌干。花影。繡颺簾旌。佛界三千籠。日月仙樓。十二挂星辰。望柘袍霞珮。並雲駟。遊紫青。

木蘭花慢

汴京

縈珠仙馭遠。橫羽葆。簇蠅旌。甚鸞月流輝。鳳雲布彩。翠遶蓬瀛。舞衣怯。環珮冷。問梨園。幾度。沸歌聲。夢裏芝田八駿。禁中花漏三更。繁華一瞬化。飛塵輦。路劫灰平。悵碧滅烟銷。紅凋露粉。寂寞秋城。興亡事空陳迹。只青山淡淡夕陽明。未向沙鷗說得。柳風吹上旗亭。

六么令

京中清明

淡烟疎雨。香徑渺啼鴉。新晴畫簾閒捲。燕外寒猶力。依約天涯芳草。染得春風碧。人閒陳迹。斜陽今古。幾縷遊絲趁飛蝶。誰向樽前起舞。又覺春如客。翠袖折取嫣紅。笑與簪華髮。回首青山一點。檐外寒

雲疊。梨花淡白。柳花飛絮。夢繞闌干一樹雲。

梅洞宋達 餘川

意難忘

同勝玉霄。周秋陽。劉向友。蕭高峯。每近古。洪流連數月。北鵝南雁。感意氣之相期。轉羽移宮。寫情詞以爲

別託光華之日。月。縱浮麗之雲烟。豈無知言。爲我回首。以重真細論文。爲韻。題樟鎮華光閣。誌別。分韻得重字。

雞犬雲中笑。種桃道士虛費春風。山城看過雁。春水夢爲龍。雲上下。燕西東。久別各相逢。向夜深江聲浦樹。燈影漁篷。舊遊新恨重重。便十分談笑。一樣飄蓬。元經擢意氣。丹鼎賺英雄。年未老。世無窮。春事苦匆匆。更與誰題詩藥市。沽酒新豐。

玉霄滕賓 天台

齊天樂 前題分得與字

片帆呼渡西山曲。匆匆載將春去。路入蒼寒。浪翻紅暖。一枕敲眠烟雨。酒朋詩侶。儘醉舞狂歌。氣吞吳楚。一樣風流。依然猶是晉風度。

人生如此奇遇。問老天何意。五星來聚。句落瑤臺。香霏寶唾。驚倒
世間兒女。渭川雲樹。悵後夜相思。月明何處。怕有新詩。雁來煩寄與。

秋陽周景 南陽

水龍吟

前題分得細字

人生能幾相逢。百年四海爲兄弟。舊時青眼。今番白髮。年華隕涕。春
更無情。拋人先去。楊花無蒂。况江程漸短。別期漸緊。須重把蘭舟繫。
幸自清江如帶。指黃壚。流鶯聲細。滄波如許。平蕪何處。明朝迢遞。
何預興亡。不如休去。牆陰挑薺。且相期共看。蓬萊清淺。更三千歲。

尙友劉將孫

廬陵

須溪先生子

憶舊遊

前題分得論字

正落花時節。憔悴東風。綠滿愁痕。悄客夢驚呼伴侶。斷鴻有約。回泊
歸雲。江空共道惆悵。夜雨隔篷聞。儘世外縱橫。人閒恩怨。細酌重論。

嘆他鄉異縣。渺舊雨新知。歷落情真。匆匆那忍別。料當君思我。我亦思君。人生自非麋鹿。無計久同羣。此去重銷魂。黃昏細雨人閉門。

高峯蕭烈 徐川

八聲甘州 前題分得文字

可憐生。飄零到茶蘼。依然舊銷魂。殘春幾許。風風雨雨。客裏又黃昏。無奈一江烟霧。腥浪捲河豚。身世忽如葉。那自一作是清潭。莫厭悲歌笑語。奈天涯有夢。白髮無根。怕相思別後。無字寫回文。更月明洲渚。杜鵑聲裏。立向臨分。三生石。情緣千里。風月柴門。

青原劉應雄 西昌

木蘭花慢 元夕郡侯邀賦

梅妝堪點額。覺殘雪未全消。忽春遞南枝。小窗明透。漸褪寒驕。天公似憐人意。便挽回和氣做元宵。太守公家事了。何妨銀燭高燒。旋

開鐵鎖。繫星橋。快燈市客相邀。且同樂時平。唱彈絃索。對舞纖腰。傳
柑記陪佳宴。待說來須更換金貂。只恐出關人早。雞鳴又報趨朝。

竹澗王學文

眉山楊學文。字必節。作

摸魚兒

送汪水雲之湘

記當年舞衫零亂。霖鈴忍接新闌。杜鵑枝上東風晚。點點淚痕凝血。
芳信歇。念初試琵琶。曾識關山月。悲絃易絕。奈笑罷顰生。曲終愁在。
誰解寸腸結。浮雲事。又作南柯夢徹。一簪聊寄華髮。乾坤桑海無
窮事。纔歷昆明初劫。誰共說。都付與焦桐。寫入梅花疊。黃花送別。休
更問湘魂。獨醒何在。沈醉浩歌發。樊榭云。天下同文集。王學文月
夜一絕。明塘破雨欲流冰。一碧涵

空萬嶺沈和夢起來猶
是蝶。驚花氣露痕深。

橫舟曾棗

書臺

鑲窗寒

簾下

繡額雲橫。銀鉤月小。綠楊庭院。疎明滿幅。永晝未收。高捲。愛空紋巧。勻曲波。弄晴日。色花陰轉。任篩金影碎。輕敲簷玉。礙雙飛燕。凝見窗留篆影。六曲雕闌。翠深絳淺。香風暗度。不隔嬌鬆鶯轉。似無情重霧下垂。嫩桃想像。添笑臉。望瑤階。宰地雙鴛。注盼金蓮遠。

晚山趙功可 廬陵

八聲甘州 燕山雪花

渺平沙。莽莽海風吹。一寒氣崔嵬。耿長天欲壓。河流不動。雲溼如灰。帝敕冰花翦刻。飛瑞上燕臺。馬上行人笑。萬玉堆。隄。滉漾天街晴晝。料酒樓歌館。都是春回。喜豐年有象。賀表四方來。仗下貂裘茸帽。擁千官齊上紫金盃。明朝起。江南驛使。來進官梅。

氏州第一 次韻送春

楊柳樓深。推夢乍起。前山一片愁雨。嫩綠成雲。飛紅欲雪。天亦留春。

不住。借問東風。甚飄泊天涯何許。可惜風流。三生杜牧。少年張緒。
陌上差差參疑是攜手去。怕行到歌臺舊處。落日啼鶻。斷烟荒草。吟不成誰語。聽西河人唱罷。何堪把江南重賦。敲碎瓊壺。又前村數聲鐘鼓。

曲遊春 次韻

千樹玲瓏罩。正蒲風微過。梅雨新霽。客裏幽窗。算無春可到。和愁都
閉。萬種人生計。應不似午天閑睡。起來起來一字疑踏碎松陰。蕭蕭欲
動疑水。借問歸舟歸未。望柳色烟光。何處明媚。抖擻人閒。除離情
別恨。乾坤餘幾。一笑晴鳧起。酒醒後闌干獨倚。時見雙燕飛來。斜陽
滿地。

聲聲慢 殘夢和兒韻

情癡倦極。天闊歸遲。吟魂無力隨風。月落牆陰。一屏睡睫濛濛。邯鄲

平生難記。記花前猶醉金鍾。留連處。忽一聲山外。吹度晴鐘。覺來
重重追憶。似遊塵飛去。那拾遺蹤。寄謝芳鄉。向來曾主夫容。人間興
亡萬感。看千年與夢皆空。披衣起。倚闌干。人在笑中。

挂枝香

和詹天遊就訪

曉天涼露。天上玉簫吹。飛聲如羽。金闕高寒。閒卻一庭梅雨。漫漫入
表塵埃夢。把文章洗空千古。精神一似。風裳水珮。蘭皋蘅浦。看萬
里跳龍躍虎。甚花嬌英氣。劍清塵撫。憔悴江南。應念小窗貧女。朱樓
十二春無際。倚蒼寒青袖如故。茶香酒熟。月明風細。試教歌舞。

綺寮怨

和兒韻

忽忽東風又老。冷雲吹晚陰。疎簾下。茶鼎孤烟。斷橋外梅豆千林。江
南庾郎憔悴。睡未醒。病酒愁怎禁。倚闌干。一扇涼風。看平地落花如
雪深。千曲囊中古琴。平泉金谷。不堪舊事重尋。當日登臨。都化作

夢銷沈。元龍邱墳無恙。誰喚起共論心。哀歌怨吟。問何似啼鳥枝上音。

柳梢青 懷青山兄時在東湖

一健如遷。東湖烟柳。坐擁吟翁。幾許功名。百年身世。相見匆匆。別來三度秋風。怕看見雲閒過鴻。酒醒燈寒。更殘月落。吾美樓中。

樊榭云。吾

美二字
疑誤。

又友人至

客裏淒涼。桐花滿地。杜宇深山。幸自君來。誰教春去。翦翦輕寒。懷無語相看。謾寫入徽絃自彈。小院黃昏。前村風雨。莫倚闌干。愁

黃水村 宜春

解連環 春夢

風樓倚倦。正海棠睡足。錦香衾軟。似不似霧閣雲窗。擁絕妙靈君。作一

盤。霎時曾見。屏裏吳山。又依約獸環半掩。到教人覷了。疑假疑真。一種春怨。游絲落花滿院。料當時錯怪。杏梁雙歸一作燕。謾記得栩栩多情。似蝴蝶飛來。撲翻輕扇。偷眼簾帷。早不見畫眉人面。但凝思紅生半臉。枕痕一線。

危復之 臨川

永遇樂

早葉初鶯。晚風孤蝶。幽思何限。簷角縈雲。階痕積雨。一夜苔生遍。玉窗閒掩。瑤琴慵理。寂寞水沈烟斷。悄無言。春歸無覓處。據譜：第十四字：下四字風亭泉石。烟林薇蕨。夢繞舊時曾見。江上閒鷗。心盟猶在。分得眠沙半。一作引觴浮月。飛談卷霧。莫管愁深歡淺。起來倚闌干。拾得殘紅一片。

姜介翁 清江

名儒草堂詩餘 卷中

四九

霓裳中序第一 春晚旅寓

園林罷組織。樹樹東風。翠雲滴。草滿舊家行迹。時聽得。聲聲。曉鶯如
覓。愁紅半溼。煞憔悴。牆根堪惜。可念我。飄零如此。一地送岑寂。龜
石。當年第一。也似老人閒風日。餘葩選甚顏色。羞撚江南斷腸詞筆。
留春渾未得。翻些三入啼鴉夜泣。清江晚。綠楊歸思。隔岸數峯出。

鞠華翁 吉水

綺寮怨 月下殘棋

又見花陰如水。兩心猶未平。正坐久。主客成三。空無語。影落楸枰。千
年人閒事業。垂成處。一著容易傾。便解圍。小住何妨。機鋒在。瞬息天
又明。甚似漢吳對營。紛紛不了。孤光照徹連城。又似殘星。向零落
有餘情。姮娥笑人遲暮。念才力底須爭。從虧又成。何人正聽。隔壁聲。

一作正隔
屋睡聲。

彭芳遠

滿江紅

風前斷笛·平韻

愁滿關山。又吹得、蘆花雪深。西樓外、天低水湧。龍挾秋吟。回首人間無此曲。數峯江上落餘音。似斷雲飛絮。兩悠悠。何處尋。江南路。晴又陰。聲韻改。淚盈襟。自中郎去後。羽泛商沈。牛背斜陽添別恨。鸞膠秋月續琴心。待醉騎黃鶴。度蒼寒。霜滿林。

戴山隱

滿江紅

風前斷笛

醉倚江樓。長空外、行雲遙駐。甚淒涼、孤吹含商。引羽薄。夜冷侵沙浦。雁老龍吟徹。寒潭雨。暮涼颺。一陣捲潮來。鷺飛去。重欲聽。知何處。誰爲我。胡牀據。謾尋尋。覓覓。凝情如許。舊日山陽猶有恨。杏花明月。今誰賦。恐憑闌。人有愛梅心。空愁許。

李裕翁

摸魚兒 春光

訝江南許多風景。繁華只在晴晝。此三兒淡施。沖融意。到處粘花著柳。
疎雨後。更豔豔綿綿。潑眼濃如酒。飛浮宇宙。但借日浮香。隨烟著物。
巧筆畫難就。惆悵處。曾記蘇隄攜手。十年驚覺回首。蒼埃霽景成
陰晦。湖水湖烟依舊。凝望久。問燕燕鶯鶯。識此年華否。長門別有。脈
脈斷腸人。柔情蕩漾。長是爲伊瘦。

龍端是

憶舊遊 題南樓

問南樓月色。十載相疎。何似今宵。舊雨菰蒲國。想波光雁影。遠撼沉
瀟。擬蘇隄據譜不平聲。上楊柳。烟碧爲誰搖。嘆庾扇塵深。胡牀夢淺。翠減
香銷。迢迢謾回首。記酌酒江山。曾共金鑣。暮色沈西壘。幾疎狂來

往。舟葉招招。浩歌拍手歸去。風月兩長橋。算此會何時。劉郎去後多
嫩桃。

蕭東父

齊天樂

扇鷺收影。驚秋晚。梧桐又供疎雨。翠箔涼多。繡囊香減。陡覺簾冰如
許。溫存誰與。更禁得、荒苔露蛩相訴。恨結愁縈。風刀難翦。幾千縷。
閒思前事。易遠。悵舊歡無據。月墮湘浦。軟玉分凋。膩雲侵枕。猶憶吹
蘭低語。如今最苦。甚怕見、燈昏夢游閒阻。怨殺嬌癡。綠窗還嘆否。

吟竹顏奎子俞 禾川

醉太平 壽須溪

茶邊水經。琴邊鶴經。小窗甲子初晴。報梅花早春。小冠晉人。小車
洛人。醉扶兒子門生。指黃河解清。

清平樂 留靜得

留君小住。且待晴時去。水鶴夜深雲外語。明日棠梨花雨。尊前不盡餘情。都上鳴絃細聲。二十四番風後。綠陰芳草長亭。

歸平遙

平字疑誤。○案：即詩國。遙以。下四首。樊榭補。

春風拂拂。簷花雙燕入。少年湖上風日。問天何處覓。湖山畫屏暗碧。夢華知夙昔。東風忘了前跡。上青蕪半壁。

浣溪沙

夢泊游絲晝影移。水沈香宛紫烟微。玉笙纔過畫樓西。天上人間花事苦。鏡中翠壓四山低。又成春過據鶯啼。

菩薩蠻

燕姬越女初相見。鬢雲翻覆隨風轉。日日轉如雲。朝朝白髮新。江南古佳麗。只縮年時髻。信手縮將成。從吾嬾學人。

大酺 和須溪春寒

唱乍茶蘼。新荷葉。誰向重簾深處。東風三十六。向園林都過。餘寒猶
妬。公子狐裘。佳人翠袖。怎見此時情否。天上知音杳。怪參差律呂。世
閒多誤。記畫扇題詩。單衣試酒。夢歸泥絮。嗟春如逆旅。送無路。遠
涉前無渡。回首住。凌波亭館。待月樓臺。滿身花氣凝香霧。度入南薰
去。留燕伴。不教遲暮。但一點芳心苦。生怕搖落。分付荷房收貯。晚妝
又隨過雨。文天集下同

憶秦娥

水雲幽。怕黃霜竹生新愁。如今何處倚。月明樓。龍吟杳杳天悠悠。
騰蛟起舞鳴篳篥。聽吹短氣江上無秋。此詞亦顧奎作。見天下同。文集。樊榭失載。附錄於後。

山樵王從叔 廬陵

昭君怨

門外春風幾度。馬上行入何處。休更捲朱簾。草連天。立盡海棠花月。飛到荼蘼香雪。莫怪夢難成。夢無憑。

阮郎歸

風中柳絮水中萍。散聚兩無情。斜陽路上短長亭。今朝第幾程。何限事。可憐生。能消幾度春。別時言語總傷心。何曾一字真。

南柯子 苦雨

碧樹留雲溼。青山似笠低。鷓鴣啼罷竹雞啼。不曉天天何意要梅肥。昨日穿新葛。今朝御袂衣。思家懷抱政難爲。只恐歸來。憔悴却羞歸。

浣溪沙 梅

水月精神玉雪胎。乾坤清氣化生來。斷橋流水領春回。昨夢醉眠苔上石。天香冉冉下瑤臺。起來窗外見花開。

秋藥香 用清真韻

薄薄羅衣乍暖。紅入酒痕潮面。絮花舞倦帶嬌眼。昨夜平隄水淺。
故人信斷風箏線。誤歸燕。夢魂不怕山路遠。無奈棋聲隔院。

精選名儒草堂詩餘卷下

靜得王夢應

長沙

樊榭

云王夢應

字聖與

錦堂春

壽李仁山

淺幘分秋涼。樽試月。西風未雁猶蟬。看芙蓉影裏。綠鬢年年。日上雲
颿壓海。塵清玉馬行天。更烟樓鳳舉。風幙麟遊。錦後珠前。綠陰池
館如畫。記晴春藥徑。雨曉芝田。已辦十年笑語。小聚雲邊。舞稱香圍
豔雪。歌遲酒落紅船。早羣仙醉去。柳掖花扶。似霧非烟。

念奴嬌

欲霜更雨。記青黃籬落。東風前此。簾外秋容人共老。雁與愁飛千里。
水郭烟明。竹陂波小。萬葉寒聲起。凭高那更。九疑吹盡雲氣。婉婉
空復多情。年年晉夢。花與柴桑是。誰解魂消風日晚。短笛孤舟林水。

江蟹籠新露黃斟淺。澆得鄉關思。平蕪天遠。一痕黃抹秋霽。

疎影

菅騰曉被。聽墮冰屋角。晴晷仍未。土溼烟生。庭揜寒青。障泥懶爲春試。東風舊與花飛去。尙記得年年沙際。忍落梅萬點苔根。化作一窗離思。猶憶薦紅穉綠。斷橋雪未掃。天近春易。老對荒寒。事舊人新。雁後不成情味。人間解有花如海。待一片不教隨水。但玉香酥影玲瓏。盡日暖紅雲裏。

劉將孫天
下同文集

醉太平 送人入湘

寒窗月晴。寒梢露明。一痕歸影燈青。又分攜短亭。蘅皋佩雲。蒸溪

酒春。有誰勤說歸程。是峯頭雁聲。上同

山庭吳元可 禾川

鳳凰臺上憶吹簫 秋意

更不成愁。何曾是醉。豆花雨後輕陰。似此心情。自可多了閒吟。秋在西樓西畔。秋較淺。不似情深。夜來月。爲誰瘦小。塵鏡羞臨。彈箏舊家伴侶。記雁啼秋水。下指成音。聽未穩。當時自誤。又况如今。那是柔腸易斷。人間事。獨此難禁。雕籠近。數聲別似春禽。

揚州慢 初秋

露葉猶青。巖花遲動。幽幽未似秋陰。似梅風帶溽。吹度長林。記當日西廊共月。小屏輕扇。人語涼深。對清觴。醉笑醒顰。何似如今。臨高欲賦。甚年來。漸減狂心。爲誰倚多才。難憑易感。早付銷沉。解事張郎風致。鱸魚好。歸聽吳音。又夜闌聞笛。故人忽到幽襟。

采桑子 春夜

江南二月春深淺。芳草青時。燕子來遲。翦翦輕寒不滿衣。清宵欲寐還無寐。顧影顰眉。整帶心思。一樣東風兩樣吹。

浪淘沙

淺約未曾來。一逕蒼苔。細挑無數棘花開。怪得閉門機杼靜。挑菜初回。幽樹鳥聲催。欲去徘徊。□□別久易相猜。幽緒一時一作晴無處著。戲打青梅。

鼎玉劉鉉

少年遊

戲友人與女客對碁

石榴花下薄羅衣。睡起却尋棋。未省高低。被伊春筍。拈了白琉璃。劍脫釵斜渾不省。意重子聲遲。對面癡心。只愁收局。腸斷欲輸時。

蝶戀花

送春

人自憐春春未去。萱草石榴。也解留春住。只道送春無送處。山花落得紅成路。高處鶯啼低蝶舞。何況日長。燕子能言語。付與光陰相客主。晴雲又捲西邊雨。

烏夜啼 石榴

垂楊影裏殘紅甚。匆匆。只有榴花全不怨東風。暮雨急。曉霞溼。綠玲瓏。比似茜裙初染一般同。

李太古 古芸

永遇樂

玉砌標鮮。雪圍風致。似曾相識。蟬錦霞香。烏絲雲溼。吹渴蟾蜍滴。青
青白白。關關滑滑。寒損銖衣狂客。儘聲聲不如歸去。歸也怎生歸得。
含桃紅小。香芹翠軟。惆悵宣城山色。百摺浮嵐。幾灣流水。那一些三
兒直。落花情味。露花魂夢。蒲花消息。據譜第九句當作六字。撫修眉
此祇四字。恐有脫誤。織烏西下。爲君凝碧。

戀繡衾

橘花風信滿院香。摘青梅猶自怕嘗。向綠密紅疎處。喜相逢飛下一

雙。堪憐堪惜還堪愛。喚青衣推上繡窗。暗記得凭肩語。對菱花啼損晚妝。

南歌子

月下秦淮海。花前晏小山。二仙仙去幾時還。留得月魂花魄在人間。河漢流旌節。天風裊珮環。滿空香霧溼雲鬟。何處一聲橫笛杏花寒。

虞美人

西風海色秋無際。雙淚如鉛水。白羊成隊夢初平。拄杖敲雲。雲外曉鴻驚。小瓊閒抱銀箏笑。問有芳卿否。否字與笑字不叶恐誤玉書分付莫開封。明日人閒。臨水拾流紅。

卜算子 夢中作

盡道是傷春。不似悲秋怨。門外分明見遠山。人不見。空腸斷。朝來

一霎晴。薄暮西風遠。却憶黃花小雨聲。誤落下。三四點。

彭履道

鳳凰臺上憶吹簫 秦淮夜月

勸客新樓。鳴箏上酒。夜涼人愛秋深。何似過賞心佳處。依約湖陰。東望寒光縹緲。烟水闊。短笛銷沈。闌干近。勝時種柳。青到如今。凌波又成誤約。自珮環飛去。暗想遺音。重省江城倦客。醉擁秋衾。誰家一掬紅淚。孤雁遠。溼逗羅襟。石城曉。數聲又遞寒砧。

蘭陵王 渭城朝雨

章臺路。西出重城幾步。秦樓曉。花氣未分。一作明。一霎空濛洗高樹。行人半倚戶。飛去黃鸝自語。秋千小。不繫柳條。惟有輕陰約飛絮。鈿車暗相遇。早拂拭紅巾。初放鸚鵡。聞歌猶是淋鈴處。喚掩面鳴箏。倚壚呼酒。東風重記舊眉嫵。報伊共歌舞。西去。屢回顧。漸客舍荒涼。

嘶馬先駐。玉關萬里知何許。但倦擁荒澤。瓜洲難渡。將軍垂老。望故國。夜夢苦。

疎影 廬山瀑布

銀雲縹渺。正石梁倒挂。飛下晴昊。早挾懸河。高瀉鯨宮。洪聲百步低小。分明仙仗。崆峒過。又化作歸帆杳杳。倚參差翠影。紅霞遠落。明湖殘照。曾共呼龍天矯。幾回過月下。先種瑤草。九疊屏風。青鳥冥冥。更約謫仙重到。長歌昨夢。騎黃鶴。飛不去。和天也笑。等恁時。秋夜攜琴。已落洞天霜曉。

蓬齋黃子行

西湖月 自度商調

湖光冷浸玻璃。蕩一晌薰風。小舟如葉。藕花十丈。雲梳霧洗。翠嬌紅怯。壺觴圍坐處。正酒醪吹波紅映。頰一作暈。尙記得。玉臂生涼。不放汗

香輕袂。殢人小摘牆榴。爲碎搯猩紅。細認裙褶。舊遊如夢。新愁似
織。淚珠盈睫。秋娘風味在。怎得對銀缸生笑靨。消瘦沈約。詩腰彷彿
堪捻。

又探梅

初弦月挂林梢。又一番西園探梅消息。粉牆朱戶。苔枝露蘂。淡勻輕
飾。玉兒應有恨。爲悵望東昏相記憶。便解珮飛入雲階。長伴此花傾
國。還嗟瘦損幽人。一作詩腰記立馬攀條。倚闌橫笛。少年風味。拈
花弄蘂。愛香憐色。揚州何遜在。試點染吟箋留醉墨。謾贏得數前調
一字疎影寒窗。夜深孤寂。

賀新郎 冰筍

開遍寒梅萼。正東皇排酥砌玉。幻成樓閣。十萬瓊瑤仙女隊。來趁春
光遊樂。向醉裏玉簪輕落。零亂不知何處去。甚人間一夜東風惡。吹

起在畫簷角。參差向曉。森如削。似吳姬妝殘粉指。向人垂著。好似西園春筍瘦。紅錦襖兒乍剝。且莫遣兒童敲却。擬辦羔兒香養酒。喚劉叉來醉尊前約。吟好句。再描摸。

滿江紅

歸自湖南題富春館

津鼓匆匆。猶記得故人相送。春江上。烏啼花影。馬嘶香鞚。情逐陽關金縷斷。淚和楊柳春絲重。算別來幾度月明時。相思夢。山萬疊。秋眉聳。春一點。歸心動。問風儂月侶。有誰遊從。百里家山明日到。一尊芳酒。今宵共。任樓頭吹盡五更風。梅花弄。

花心動

落梅

誰倚青樓。把謫仙長笛。數聲吹裂。一片乍零。千點還飛。正是雨晴時節。水晶簾外東風起。卷不盡滿庭香雪。畫闌小。斜鋪亂點。翠苔成纈。嫋嫋餘香未歇。空悵望音塵兩眉愁切。翠袖淚乾。粉額妝寒。此恨

有誰同說。江南春信無痕跡。餘情在冷烟殘月。夢魂遠。蘭燈伴人易滅。

小重山

一點斜陽紅欲滴。白鷗飛不盡。楚天碧。漁歌聲斷晚風急。攪蘆花飛雪。滿林溼。孤館百憂集。家山千里遠。夢難覓。江湖風月好收拾。故溪雲深處。著蓑笠。

龍紫蓬

齊天樂 題藤王閣

雨簾雲棟重尋處。青紅半空飛去。檻影侵鷗。簷光送雁。搖蕩秋容千里。歌珠舞翠。怎禁得無情。一江流水。可是西山。半眉新綠。向人覷。千年留下賸賞。儘登臨無限。須付才思。壞堞閒愁。危檣往恨。欲拍闌干無路。新碑舊記。更今古匆匆。一番興廢。立盡斜陽。共誰評半語。

竹屋蕭允之

渡江雲 春感用清真韻

薔薇開欲謝。峭寒漸少。軒檻俯晴沙。先來愁未了。又聽一聲新闕落。
漁家。徘徊竚立。似玉笛三弄。昭華春晝長。暗懷誰寫。戲墨亂翻鴉。
吁嗟。詩情偏雋。酒興偏豪。記南樓月下。曾共樂沈烟綺席。燭影窗紗。
穠香秀色知何處。甚忘却隄柳汀葭。空惆悵。無人共採蘋花。

滿江紅 雨中有懷

冷逼疎簾。渾不似。今春寂寞。風雨橫。賞心歡事。總如雲薄。柳眼花鬚
空點綴。鶯情蝶思。應蕭索。但遶亭流水。碧潺潺。車音邈。懷往事。孤
素約。酒未飲。愁先覺。甚中年滋味。共誰商略。青草易添閒客恨。垂楊
難繫行人脚。謾幾回吟遍。夕陽紅。闌干角。

瑣窗寒

細雨收塵。輕寒弄日。柳絲掠道。桃邊杏處。猶記玉驄曾到。對東風。回首舊遊。香銷豔歇。無音耗。悵佳人。有約難來。綠遍滿庭芳草。愁抱。沈吟久。問翠珥金鈿。爲何人好。回文細字。塵暗當年纖縞。倚闌干。斜陽又西。歡期易失。春易老。待何事。再覓珍叢。共把清樽倒。

蝶戀花

十幅歸帆風力滿。記得來時。買酒朱橋畔。遠樹平蕪空目斷。亂山惟見斜陽半。誰把新聲翻玉管。吹過滄洲。多少傷春怨。已是客懷如絮亂。畫樓人更回頭看。

虞美人

朱樓曾記回嬌盼。滿坐春風轉。紅潮生面酒微醺。一曲清歌。留住半窗雲。大都咫尺無消息。望斷青鸞翼。夜長香短燭花紅。多少思量。只在雨聲中。

點絳脣 記夢

花徑相逢。眼期心諾情如昨。怕人疑著。佯弄秋千索。知有而今。何似當初莫。愁難托。雨鈴風鐸。夢斷燈花落。

唸所蕭漢傑 吉水

賣花聲 春雨

溼逗晚香殘。春淺春寒。灑窗填戶著幽蘭。慘慘悽悽仍滴滴。做出多般。和霰撒珠盤。枕上更闌。芭蕉怨曲帶愁彈。綠遍階前苔一片。曉起誰看。

菩薩蠻 春雨

春愁一段來無影。著人似醉昏難醒。烟雨溼闌干。杏花驚曉一作寒。唾壺敲欲破。絕叫憑誰和。今夜欠添衣。那人知不知。

蝶戀花 春燕和韻

一縷春情風裏絮。海闊天高。那更雲無數。嬌顛畫梁非爲雨。憐伊只合和伊住。欲話因緣愁日暮。細認簾旌。幾度來還去。萬一這回航可渡。共渠活處尋條路。

浪淘沙

中秋雨

愁似晚天雲。醉亦無憑。秋光此夕屬何人。貧到今年無月看。留滯江城。夜起候簷聲。似雨還晴。舊家誰信此時情。惟有桂香時入夢。句引詩成。

懶融段宏章

禾川

洞仙歌

茶蘼

一庭晴雪。了東風孤注。睡起濃香占窗戶。對翠蛟盤雨。白鳳迎風。知誰見愁與飛紅流處。想飛瓊弄玉。共駕蒼烟。欲向人間挽春住。清淚滿檀心。如此江山。都付與斜陽杜宇。是會約梅花帶春來。又自趁

梨花送春歸去。

桂所劉貴翁 廬陵

滿庭芳 荈

燕子宮一作鳥西飛。楊花北去。春風飄向伊誰。盈盈小小，輕薄不堪肥。天付風流到骨，消不盡、流落清池。誰知道，踏歌朝暮，癡絕待渠歸。情
惜春似酒，日痕生紺，裙色明漪。笑東家西沼，到處依依。同是春風種得，獨無據、飄泊年時。青梅落，水光簾影，小翠立橫枝。

黃霽宇

水龍吟 青絲木香

麗華一握青絲。金珠粟粟香環裏。春窺綺閣，新妝風舞，銖衣如碎。翠鳳蒼蚪，騎來下界。蝶驚蜂避。甚二三富貴，垂垂曉露，猶凝滿身珠翠。誰共那人結髮，問何時、蹇修爲理。對花一笑，香茸易翦，碎金難綴。

半點芳心亂。愁如織。縷絲傳意。倩東皇拂拭。新條更與作來生計。

梅邊王鼎翁書臺

沁園春

又是年時。杏紅欲臉。柳綠初芽。奈尋春步遠。馬嘶湖曲。賣花聲過。人唱窗紗。暖日晴烟。輕衣羅扇。看遍王孫七寶車。誰知道。十年魂夢。風雨天涯。休休。何必傷嗟。謾贏得青青兩鬢華。且不知門外。桃花何代。不知江左。燕子誰家。世事無情。天公有意。歲歲東風歲歲花。拚一笑。且醒來盃酒。醉後盃茶。

雲閑劉天迪西昌

齊天樂

嚴縣尹席上和李觀我韻

瑞麟香軟飛瑤席。吟仙笑陪歡宴。桐影吹香。梅陰弄碧。一味微涼堪薦。停盃緩勸。記羅帕求詩。琵琶遮面。十載揚州。夢回前事楚雲遠。

名儒草堂詩餘 卷下

七五

人生總是逆旅。但相逢一笑。如此何限。采石宮袍。沈香醉筆。何似輕衫小扇。流年暗換。甚新雨情懷。故園心眼。明日西江。斜陽帆影轉。

一萼紅 夜聞南婦哭北夫

擁孤衾。正朔風淒緊。氈帳夜驚寒。春夢無憑。秋期又誤。迢遞烟水雲山。斷腸處。黃茅瘴雨。恨驄馬。惟悴只空還。揉翠盟孤。啼紅怨切。暗老朱顏。堪歎。揚州十載。甚倡條冶葉。不省春殘。蔡女悲笳。昭君怨曲。何預當日悲歡。謾贏得。西鄰倦客。空惆悵。今古上眉端。夢破梅花。角聲又報更闌。

虞美人 春殘念遠

子規解勸春歸去。春亦無心住。江南風景正堪憐。到得而今。不去待何年。無端往事縈心曲。兩鬢先驚綠。薔薇花發望春歸。謝了薔薇。又見棟花飛。

蝶戀花

日暮揚花飛亂雪。寶鏡慵拈。強整雙鴛結。燒罷夜香愁萬疊。穿花暗
避階前月。鳳尾羅衾寒尚怯。却悔當時容易成分別。悶對枕鸞誰
共說。柔情一點薔薇血。

鳳棲梧

舞酒妓

一翦晴波嬌欲溜。綠怨紅愁。長爲春風瘦。舞罷金杯眠黛皺。背人倦
倚晴窗繡。臉暈潮生微帶酒。催唱新詞。不應頻搖手。閒把琵琶調
未就。羞郎却一作還又垂紅袖。

點絳脣

書事

一笑相逢。依稀似是桃根舊。嬌波微溜。悄可靈犀透。扶過危橋輕
引纖纖手。頻回首。何時還又。微月黃昏後。

張半湖

滿江紅 夏

新綠池塘。一兩點荷花微雨。人正靜。桐陰竹影。半侵庭戶。欹枕未圓。蝴蝶夢。隔窗時聽幽禽語。捲紗幃。隨意理琴絲。黃金縷。鮫綃扇。輕舉。龍涎餅。微微炷。向水晶宮裏。坐消祥暑。剝啄誰敲。棋子響。鶯兒林裏驚飛去。最好是。活水淪新茶。醒春醕。

掃花遊

柳絲曳綠。正豆雨初晴。水天朱夏。石榴綻也。看猩紅萬點。倚亭欹榭。鎖闥深中。料想酒闌歌罷。日將下。是那處。藕花香勝沈麝。窗外風竹打。似戛玉敲金。送聲瀟灑。共觀古畫。喚石鼎烹茶。細商幽話。寶鴨香消。天外新蟾低挂。涼無價。又丁東數聲簷馬。

溪山劉景翔 安成

念奴嬌 碧香

甚情幻化似流酥。圍煖。酣春嬌寐。不數錦篝烘古篆。沁入屏山沈水。
笑吐丁香。紫綃襯粉。房別還同蒂。翠一作毳移影。媚人清曉風細。
依約玉骨盈盈。小春暖逗。開到燈宵際。疑是九華仙夢冷。誤落入間
遊戲。比雪情多。評梅香淺。三白還堪瑞。塵緣洗盡。醒來還又惹翠。

小重山

枕屏風

山翠晴嵐曲曲。紅香浮玉。醉窩頰。不煩人築。避風臺。瀟湘路。隨意
自徘徊。春倦怕頻催。琵琶私語近。問誰來。春風那隔錦雲堆。夢中
蝶。飛去又飛回。

玉樓春

落花

可憐又誤江南景。雨膩風喧愁入暝。依稀碧玉水邊魂。憔悴綠珠樓
外影。點點隨人飛遠近。薄倖相逢情怎忍。年年三月化香塵。天上
人間看夢醒。

如夢令

獨立荷汀烟渚。一霎錦雲香雨。似爲我無情。驚起鴛鴦飛去。飛去。飛去。却在綠楊深處。

霽海周伯陽

摸魚兒 次韻送別

又匆匆月鞭露鏡。梅花江上歸路。海圖破碎來時線。何似綵衣低舞。風雪暮。正望斷青山。一髮雲橫處。浩歌獨舉。便想見迎門。牽衣兒女。總是舊眉嫵。陽關曲。揮灑紫薇花露。妙音清遠高古。經寒楊柳休輕折。搖動一溪霜霧。邯鄲步。笑布襪青鞋。去住知何許。汀鷗沙鷺。若問我重來。明年有約。今日是前度。

春從天上來 武昌秋夜

浩蕩青冥。正涼露如洗。萬里虛明。鼓角悲健。秋入重城。彷彿石上三

生。指蓬萊雲路。渺何許。月冷風清。倚南樓。一聲長笛。幾點殘星。西風舊年有約。聽候蛩語夜。客裏心驚。紅樹山深。翠苔門掩。想見露草疎螢。便乘風歸去。闌干外。河漢西傾。笑淹留。劃然孤嘯。雲白天青。

琴泉尹公遠

尉遲丕孟 題盧石溪響碧琴所

冰絃語。在竹樹院落深深處。當年野草閑花何許。浮雲飛絮。征鴻止。止。縱汗漫遊人遠。回顧。遲瓊樓五色簾開。喚醒元鶴飛舞。何事夢斷湖山。尚九里松聲。八月潮怒。三十年餘池臺淚。應不爲花妖羯鼓。想天上羣仙老矣。甚比似人間更愁苦。倩畫闌留住。西風。莫教吹入雲去。溪翁琴皆操新音故云。

齊天樂 贈盧天隱

江湖千里秋風客。翩然白雲黃鶴。石鼎烟霏。篆書紅溼。隨處橘香泉

緣幅巾野服。儘掃葉開門。抱琴聽瀑。何事蓬壺。歸來猶待海濤陸。
盧鴻舊時隱處。想斜陽草樹。水榭村一作雲屋。塵尾元元。筆花語語。翦
盡西窗殘燭。黃庭誤讀。且東老留詩。采和歌曲。後日重尋。洞天三十
六。

仁飛李天驥 廬陵

摸魚兒 燈花

又何須向明後滅。寒花點綴孤影。玉龍度海。吹魚浪。烟淡寶釵橫鬢。
斜又整。是蟲滴驪珠。兩兩相交頸。夜長人靜。恁玉果低拋。金錢暗卜。
此意有誰領。懽娛事。料想憑伊先應。怕綃新淚猶凝。銀篋未忍輕
挑下。只恐暗風吹燼。重記省。怕莫是明朝。有箇青鸞信。怎知無定。算
只解窺人。人孤影隻。成瘦又成病。

定叟劉應幾 安成

憶舊遊 闌雁

記銅駝載酒。翠陌吹簫。曾聽相呼。不盡離離意。覺柔腸如翦。立馬踟
躕。人生似此蒼鬢。堪得幾聲疎。想怨入秋深。愁隨天遠。滿目平蕪。
音書未曾寄。正人在燕臺。忘却回車。奈菰蒲舊地。口山空木落。霜老
泉枯。月明仙掌何處。轉首失棲烏。待說與雲間。瀟湘近日風捲湖。據

後段第六句山空上當
增一字作五字一句

梅心周孚先 西昌

木蘭花慢 富州道中

訪梅江路遠。喜春在劍川湄。正雁蹟雲深。漁村笛晚。茸帽斜欹。舊遊
不堪回首。更文園多病減腰圍。惟有秋娘聲價。風流仍似前時。依
稀壁粉舊曾題。烟草半淒迷。歎單父臺荒。黃公壚寂。難覓佳期。誰家
歌樓催雪。遣夜來風雨緊些兒。醉後唾壺敲缺。龍光搖動漣。一作漪。

鷓鴣天 禁酒

會唱陽關送客時。臨歧借酒話分離。如何酒被多情苦。却唱陽關去別伊。歡會遠。渺難期。黃壚門掩晝陰遲。青樓更有癡兒女。謾憶胡姬捧勸詞。

蝶戀花

舟檣津亭何處樹。曉起瓏璵。回首迷烟霧。江上離人來又去。飄零只似風前絮。倦倚篷窗誰共語。野草閒花。一一傷情緒。明日重來須記取。綠楊門巷深深處。

礪民尹濟翁 廬陵

木蘭花慢 寄朱子西

渺渺懷芳意。苦對景可憐生。記燕外鶯邊。柳深竹嫩。度密穿青。如今淡烟細雨。正午窗半夢酒初醒。樂事怎堪重憶。起來一晌愁縈。悠

然又把酒壺傾。擺不動離情。想閒却春遊。綠陰深院。芳草長亭。乾愁
有誰解得。傍晚來風起。碎池萍。坐待晴雲四捲。依然月上疎櫺。

玉蝴蝶

和劉清安

幾許暮春清思。未知芍藥。先擬荼蘼。老却東風。春去不與人期。似情
多何曾荀倩。便夢斷不爲崔徽。且銜盃。暖風襲襲。淡日暉暉。怎知。
懷芳心在。樹花露溼。葉竹一作拈烟啼。滿日青紅。新愁成陣。恨成圍。畫
簾空。龍媒獨倚。午陰靜。燕子雙飛。任春歸。尋人柳下。夢句堂西。

聲聲慢

禁釀

雕鞍芳草。徑一作翠管長亭。春醒不負年華。幾丈閒愁。寄風吹落天涯。
深深小簾朱戶。是何人重整香車。愁未醒。記竹西歌吹。柳下人家。
眉鎖何曾舒展。看行人都是。醉眼橫斜。寄與高陽。從今休喚流霞。殘
春又能幾許。但相從評水觀茶。清夢遠。怕東風猶在杏花。

風入松 癸巳壽須溪

曾聞幾度說京華。愁壓帽簷斜。朝衣熨貼天香在。如今但彈指蘭闈。不是柴桑心遠。等閒過了元嘉。長生休說棗如瓜。壺日自無涯。河傾南紀明奎壁。長教見壽烝成霞。但得重攜溪上。年年人共梅花。

一萼紅 和玉霄感舊

玉搔頭。是何人敲折。應爲節奏謳。斐几朱絃。翦燈雪藕。幾回數盡更籌。草草又一番春夢。夢覺了。風雨楚江秋。却恨閒身。不如鴻雁。飛過妝樓。又是水枯山瘦。歎回腸難貯。萬斛新愁。嬾復能歌。那堪對酒。物華冉冉都休。江上柳。千絲萬縷。惱亂人。更忍凝眸。猶怕月來弄影。莫上簾鉤。

會心彭泰翁 安成

念奴嬌 秋日牡丹

九華驚覺。又偷承雨露。羞勻春色。岸蓼汀蘋成色界。未必天香人識。
粉浣脂凝。霜銷霧薄。嬌顛渾無力。黃昏月掩。山城那更聞笛。應是
未了塵緣。重來遲暮。草草西風客。鶯燕無情。庭院悄。愁滿闌干苔積。
宮錦尊前。霓裳月下。夢亦無消息。嫣然一笑。江南如此風日。

憶舊遊 雨中海棠

玉環扶淺醉。翠袖籠寒。香汗初融。昨夜殘妝在。最難勝。珠絡都心。鉛
紅。朝雲低護。深約蜂蝶。不知蹤。奈燕子情多。斜飛輕觸。淚灑羞容。
重逢記前度。解翦燭調笙。踏月鳴驄。風入人閒遠。待塵緣洗盡。飛珮
凌空。丁甯爲我留住。攜酒壽東風。便花譜重修。高堂再賦。疑夢中。

拜星月慢 祠壁宮姬控絃可念

霧鬢一作滑。觚稜塵侵團扇。恨滿哀彈。倦理控雨籠雲。共閒情。孤倚。斂
蛾黛。怕似流鶯。嚶嚶惹得玉銷瓊碎。可惜闌干。但苔花洗穗。算天

音不入人間耳。何人謾裏損青衫淚。不是舊譜都忘。厭新腔嬌脆。多
生不得丹青意。重來又花鎖長門閉。到夜永笙鶴歸時。月明天似水。

鷓江會允元 西昌

水龍吟 春夢

日高深院無人。楊花撲帳春雲暖。回文未就。停針不語。繡牀倚遍。翠
被籠香。綠鬟墮膩。傷春成怨。儘雲山烟水。柔情一縷。又暗逐金鞍遠。
鸞珮相逢甚處。似當年劉郎仙苑。凭肩後約。畫眉新巧。從來未慣。
枕落釵聲。簾開燕語。風流雲散。甚依稀難記。人間天上。有緣重見。

月下笛 女韻

吹老楊花。浮萍點點。一溪春色。閒尋舊迹。認溪頭浣紗磧。柔條折盡
成輕別。向空外瑤簪一擲。算無情更苦鶯巢。暗葉啼破幽寂。凝立
闌干側。記露飲東園。聯鑣南陌。容銷鬢減。相逢應自難識。東風吹得

如海。謾點染空階自碧。獨歸晚。解說心中事。月下短笛。

齊天樂 次韻趙芳谷曲。有香玉之怨。

碧梧枝上占秋信。微聞雨聲還愜。虹影分晴。雲光透晚。殘日依依團
箠。闌干一霎。又長笛歸舟。亂鴉荒堞。兩鬢西風。有人心事到紅葉。
嬌蓮相對欲語。奈蓮莖有刺。愁不成折。天上歡期。人間巧意。今夜明
河如雪。新寬帶結。想寶篆頻溫。翠奩低揭。霧溼雲鬟。淺妝深拜月。

點絳脣

一夜東風。枕邊吹散愁多少。數聲啼鳥。夢轉紗窗曉。來是春初去
是春將老。長亭道。一般芳草。只有歸時好。

右元草堂詩餘三卷。元廬陵鳳林書院本。無名氏輯。案草堂詩餘。久爲後人指摘。朱竹垞詆之尤力。謂其所收最下最傳。又謂填詞最雅。無過石帚。不登其隻字。可謂無目。署曰名儒草堂詩餘。而是書乃襲其名。厲樊榭稱其采擷精妙。無一語凡近。弁陽老人絕妙好詞而外。渺焉寡匹。則相去實逕庭矣。詞綜發凡稱鳳林書院元詞。又稱冠別字於姓名之前者。鳳林書院體。卽是書也。却無貶詞。顧棗匡曾刻入讀畫齋叢書。是編則經樊榭屢校。以授嚴道甫長明者。澹生太史重刻之。洵善本也。楊用脩詞品稱元人工於小令套數。而詞學漸衰。惟滕玉霄賓填詞。不減宋人之工。玉霄詞屢見集中。雖署曰元人。實皆宋遺民所作也。至選及文相國詞。似可不必。又如選羅志人之木蘭花慢禁釀。周孚先之鷓鴣天禁酒。尹濟翁之聲聲慢禁釀等數闕。殊非太平景象。則又藉以略見元時之糺政。固不僅作詞家南董已也。

名儒草堂詩餘 跋

咸豐癸丑十月之望。望南海伍崇曜跋。

晚唐五季。柔曼綺靡之音。化爲側豔。一時文人學士。競撰新聲。別開生面。專集創自金荃。陽春。雖金荃佚而陽春尙存。選錄始於家宴。花間。迨家宴亡而花間爲冠。自茲以後。如梅苑樂府雅詞。陽春白雪。花庵詞選。絕妙好詞。草堂詩餘等書。並皆規模衛尉。搜探靡遺。唐宋以來。詞人亦云大備。至若尊前集。花草粹編。更無論矣。曩於讀畫齋叢書中。見鳳林書院名儒草堂詩餘三卷。雖錄於元代。猶是南宋遺民。寄託遙深。而音節激楚。故厲太鴻比諸清湘瑤瑟。與弁陽所選。并稱不朽。信乎標放言之致。則愴快而難懷。寄獨往之思。又鬱伊而易感也。刻本魚魯頗多。暇日以樊榭手校本更加釐正。匪云糾謬。藉資諷詠焉爾。

嘉慶辛未秋八月寒露後三日。江都秦恩復跋。

元鳳林書院草堂詩餘三卷。亡名氏選。至元大德間諸人所作。皆南宋遺民也。詞多悽惻傷感。不忘故國。而於卷首冠以劉藏春許魯齋二家。厥有深意。至其采擷精妙。無一語凡近。弁陽老人絕妙好詞而外。渺焉寡匹。余於此二種。心所愛玩。無時離手。每當會意。輒欲作碧落空歌。清湘瑤瑟之想。雍正甲辰四月十七日。樊榭山民鶯記。

甲辰春晚。讀書於外家蔣氏之水軒。凡十日。錄成此本。爲予手裝。精好者。符子聖幾也。鶯又記。

此本借鈔於吳君尺鳧繡谷亭所藏。頗多顛倒殘缺。略爲校定。而脫字則仍之。今年冬日。舟檣虎邱。從山塘書肆中。借得朱竹垞先生家鈔本。復補改數字。下卷題滕王閣齊天樂一首。添入龍紫蓬姓氏。殊快人意。但朱本上卷姓氏多遺落。不可解也。雍正庚戌陽月七日。樊榭山民再題於邗江小玲瓏山館。

諸公之作。散見於他書者絕少。偶見劉應李翰墨大全。劉將孫天下同文集內有數首。亟付錄於卷中。零珠碎玉。亦自可寶。願與知音者共之。庚戌大雪日。鶚記。

雍正癸丑。中冬廿二日。在廣陵小玲瓏山館。得新購元刻草堂詩餘三冊。增入趙功可三首。李太古三首。復校定數十字。始稱善本。爲之快絕。樊榭又記。

庚戌冬。予客邗上。借樊榭先生鳳林書院詞鈔本。篝燈手錄。凡五七夜。吟玩之餘。殊覺忘旅食况也。臘八日。對漚主人陳皋呵凍識。

元鳳林書院草堂詩餘三卷。樊榭先生所手錄也。乾隆乙亥。薄游邗上。先生持以見贈。并告以詞家選本自弁陽老人絕妙好詞而外。卽推此種。采擷精妙。無一語凡近。平生愛翫。未嘗離手。每當會意。輒作碧落空歌。清湘瑤瑟之想。今先生下世幾卅載矣。偶檢巾箱得之。風

窗展誦。不覺泫然。後數行及故友陳江皋書夾簽卷內。并爲黏綴于後。以見同時之嗜學如此。時庚子十月。道甫嚴長明書於冬讀書齋之南榮。



編主五雲王

編初成集書叢

餘詩堂草儒名

中華民國二十八年十二月初版

輯者 廬陵鳳林書院

發行人 王雲五
長沙南正路

印刷所 商務印書館

發行所 商務印書館
各埠

(本書校對者褚志政)

G 一七二六上



3
4
2643